

Erromerian kanposantura

Domu Santu egunean hilerriak jende eta lorez bete ziren urtero legez

Heriotza ez da amaiera». Urtero-urtero gure hildakoak gogoratzen baititugu bizirik baleude bezala. Santu Guztien jaiak, bizirik daudenek hildakoak omendu edo gogoratzen dituzten egunak, hilerrietako ohizko isiltasun eta iluntasuna apurtu zuen atzo.

G. AGIRRE / DERIO

Kanposantuek beren ohizko aurpegi iluna aldatu zuten eta, lore sorta koloretsu, jende, malko eta otoitzez bete ziren azaroaren lehenengo egunean.

Derioko (Bizkaia) hilerria hurbiltzeko autobus eta tren bereziak izan ziren arren, goizean goiz auto ilara luzeak izan ziren atzo. Autoz joan zirenek buelta bat baino gehiago eman behar izan zuten aparkatzeko lekua aurkitzeko.

Bilboko kanposantua azken egun hauetan jarri dituzten saltokiz inguratutik itzartu zen atzo goizean. Ohizko loren saltokiez gain, beste mota askotakoak aurki zitezkeen, hala nola, kandela, erroskila, zapi, zama, goxoki, globo edo bitxikeri saltzaileak, baita «paisak» ere. Saltzaileez aparte, Gurutze Gorria eta DYako bolondresak ikus zitezkeen nonnahi diru eske.

Saltokietan mota guztietako lorak aurki zitezkeen, krabelinak, larrosak, urreliliak, margaritak, oilarbutzanak, lilium-ak eta abar. Egun honetako loren prezioak ezberdinak dira, krabelin dozena 1.000 eta 1.300 pezeta tartean (43 eta 56 libera bitartean), lore-lanak 3.000 pezetatik gora, oilarbutzanak 250 pezetan alea eta urrelilien sorta 1.500 pezetatik gora, besteak beste.

Lore saltzaileen arabera, kra-



Harrigarria izan arren saltzaileak ere erruz bildu ziren atzo kanposantura.

MARISOL RAMIREZ



Loreek protagonismo itzela izan zuten urtero legez.

MARISOL RAMIREZ

belinak eta oilarbutzanak izaten omen dira Domu Santu egunean gehien saltzen diren lorak. Nahiz eta, azken urteetan udaberriko lorak deiturikoen salmenta ere asko igo den. Iturri berberen esanetan, pertsona bakoitzeko batez

besteko gastua egun honetan 5.000 pezeta ingurukoa da.

«Jendea nazkatutik dago hilerrian lore sorta bat jarri eta hurrengo egunean lapurtu dutela ikusteaz», esan zuen lora batzuk erosten zegoen emakume batek.

Lora saltzaileez aparte, badira egun honetan negozio egiten duten beste zenbait ere, nahiz eta, azken hauek diru gutxiago irabazi. Hilerrietan hilobi eta nitxoak garbitzen dituzten neska-mutil gazteak dira, alegia. Gazte hauek gutxi gora-behera urriaren 15ean hasten dira beren txukuntze lanean, kanposantura hurbiltzen dira eta han ibiltzen dira bueltaka beraien zerbitzuak nork eskatu zain.

Gazte hauek esku batean eskailera eta bestean ur eta xaboiez bustitako zapia eramaten dute. Jendeak laguntza eskatzen denean, eskailerara igo, nitxoko hilerria garbitu eta lora sorta eskegitzen dute. Lan horren truke borondatea eskatzen dute. «Gehienek 300 edo 500 pezeta ematen dizkigute. Gaur goizean, jadanik, bik milana pezeta eman dizkigute», azaldu zuten mutil gazte batzuek. Atzo goizean, adibidez, berrogei bat aldiz igo zuten eskailera.

Narkotrafikoagatik atxilotuen kopuruak behera egin zuen iaz

DONOSTIA

Narkotrafikoagatik atxilotutako lagun kopuruak behera egin zuen iaz EAEn. Arlo honi lotutako delituak zirela eta, 234 pertsona atxilotu zituen Poliziak 1992. urtean, Estatuko Fiskaltza Nagusiak emandako datuen arabera.

Txostenean azken urteotako datuak ageri dira. Honen arabera, atxilotetarik gehienak 1986 eta 1987. urteetan egin ziren, orduko zenbakiak 1.009 eta 1.000 lagunekoa izan baitziren, hurrenez hurren.

1992. urtean ere droga ha-

rrapaketa gutxien izan zen 1985. urteaz geroztik. Urte hartan 366 dekomiso izan ziren. Iaz, aldiz, 175 baino ez. 1988an inoiz baino harrapaketa gehiago izan ziren, 702 guztira.

1985 eta 1992. urteak bitartean 1990ean atzeman zen heroina kopuru handiena, 94.894 gramo orotara. 1985. urtean, oster, 7.789 izan ziren.

Kokainari dagokionez, 1988a izan zen urte oparoena harrapaketa arloan, orduan 1.007.182 gramo aurkitu baitzituzten funtzionari polizialek.

Gaur hasiko dira Donostian UEUren IX. Jardunaldiak

DONOSTIA

Gaur hasi eta datorren ostirala bitartean, hilaren 5era arte alegia, Udako Eukal Unibertsitatearen (UEU) IX. Jardunaldiak egingo dira Donostian. Hainbat gaien inguruko lau hitzaldik osatuko dituzte jardunaldi hauek eta guztiak Garibai Hitzaldi Aretoran emango dira, iluntzeko 19.30etan hasita.

Gaurko ekitaldia Kepa Altomaga UEUko zuzendariak hasiko du, berak egingo baitu jardunaldion aurkezpena. Ondoren, Mikel Azurmendi EHuko irakasleak Euskal Herriko historia eta narrazio-aukerak izango ditu mintzangai. «Gure herriko his-

torian, galtzailea ez da azaltzen, baserritarra isildua gelditu zaigu eta. Beronen jarrera, izaera eta joerak argitu nahi ditugu ikuspegi antropologiko berri batetik», azaldu dute.

Bihar, «Heziketa sexuala eskolan» deituriko hitzaldia emango du Luis Elberdin sexologoak. Udalerrri euskaldunen inguruan ariko dira berriz ostegunean, Antton Iztueta UEMako lehendakaria eta Iñaki Arregi EKBko teknikaria. Azkenik ostiralean, «Xiberuko kantoreak eta multimedia» izango da hitzaldiaren izenburua eta K. Arbelaizta, M. Bedaxagar, P. Dagorret, A. Gastanbide, eta J.M. Larasketa izango dira hizlari.

LABURREAN

ERREPIDE istripuan hiru lagun hil dira Oñatin

Hiru gazte hil ziren atzo goizaldean eta laugarren bat larri zauritu Oñatin gertatutako errepide istripuan. Goizeko bostak aldera gertatu zen ezbeharra, ordu horretan atera baitzen SS-5510-X matrikuladun Renault-5 autoa errepidetik. Moises R.S. 23 urtekoa, Francisco Javier D.S. 18koa eta Maria Cristina P.E. 23koa dira hildako hiru gazteak.

EUSKALERRIAREN Adiskideen Elkarteak batzarra

Euskalerriren Adiskideen Elkartearen (RSBAP) Bizkaiko batzordeak, biltzar orokorra egin berri du Bilbon. Biltzar honen harian, hil berri den Frantzisko Abrisketa elkarte honetako ohorezko bazkideari omenaldia egin zioten. Era berean, ohorezko bazkide berriak izendatu zituzten: Jesus Astigarraga, Roman Basurto, Juan Andres Legarreta, Luis de Leon, Juan Libano, Lorenzo Mendieta, Jose Manuel Muñoa, Emilio Mujika, Manuel Pagola, Juan Manuel Palenzuela, Ascension Pastor, Guillermina Rodrigo, eta Margarita Santo Domingo.

EAeko parlamentariak Telebista Forumean

Eusko Legebiltzarreko parlamentari talde batek, Rafael Larreina EITBren kontrolerako batzordeko lehendakaria buru dutela, ostegunetik larunbatera bitartean Istanbulen (Turkia) egingo den Europako Telebista Forumean hartuko du parte. «Telebistaren etorkizuna: kate orokorrak ala tematikoak» izango da forumeko mintzagaia.

Bigreba deialdi egin ditu hil honetarako Ikasle Sindikatuak

Ikasleen sindikatuak greba eta mobilizazio deialdia egin du datorren hilaren 17rako irakaskuntza ertainean eta unibertsitatean. Zehazki, irakaskuntza ertainetarako egin dute greba deialdia eta unibertsitatean «borroka eguna» izatea nahi dute.